

# Inatsisartunut qinersisarneq pillugu Inatsisartut inatsisaat

## Kapitali 1

### *Qinersisinnaatitaaneq qinigaasinnaatitaanerlu*

#### *Qinersisinnaatitaaneq*

**§ 1.** Kinaluunniit qallunaatut innuttaassuseqartoq, 18-inik ukioqalereersimasoq qinersinissarlu sioqqullugu sivikinnerpaamik qaammatini arfinilinni Kalaallit Nunaanni aalajangersimasumik najugaqarsimasoq eqqartuussivikkoortumik Kalaallit Nunaanni atuuttussatut aalajangikkamik nammineersinnaajunnaarsitaasimangikkuni Inatsisartunut qinersisinnaatitaavoq.

**§ 2.** Inuit tulliuttut Kalaallit Nunaata avataani najugaqarallartut Inatsisartunut qinersisinnaatitaapput § 1-imi piumasarineqartut, aalajangersimasumik najugaqarnissamik piumasaqaat eqqaassanngikkaanni, naammassisimagunikkit:

- 1) Inuit minnerpaamik qaammatini 6-ini sivisussusilimmik ilinniarnerminni, ilinniarnissaq siunertaralugu Kalaallit Nunaata avataaniittut.
- 2) Inuit nakorsap innersuussinera malillugu peqqissutsimut tunngasunik pissuteqarlutik Kalaallit Nunaata avataaniittut.
- 3) Inuit Kalaallit Nunaanni qinigaallutik folketingimut ilaasortatut atuuffimminnik isumaginninnerminnut atatillugu Danmarkimiittut.
- 4) Inuit Namminersorlutik Oqartussanut sinniisuullutik nunani allaniittut.
- 5) Inuit Kalaallit Nunaata avataaniittut aammalu Kalaallit Nunaannut attuumassuteqarnikkut inunnut nr. 1-4-mi taaneqartunut sanilliunneqarsinnaalluinnartut.

*Imm. 2.* Inuup inummik imm. 1-imut ilaatinneqartumik ataatsimut najugaqateqarluni inooqateqartup, aammalu § 1-imi piumasaqaatinik naammassinittup, qinersisinnaatitaanermut piumasaqaatit aamma naammassisimassavai, inooqatigiit pineqartut marluk taakku:

- 1) imminnut katissimappata, imaluunniit
- 2) imminnut katissinnaanissaminnut piumaqaatit naammassisimappatigit Kalaallit Nunaanniillu aallannginnermi ataatsimut najugaqalersimappata.

*Imm. 3.* Inuilli imm. 1-imi 2-milu taaneqartut aatsaat qinersisinnaatitaapput nuunnissartik sioqqullugu ikinnerpaamik ukiuni marlunni Kalaallit Nunaanni najugaqartutut Inunnut Nalunaarsuutit Eqiteruffianni nalunaarsorneqarsimagunik.

*Imm. 4.* Inuit imm. 1 aamma 2 naapertorlugit Kalaallit Nunaata avataani najugaqarallartut

najugaqarallarnermullu tunngaviusup naammassinerata kingorna qaammatit arfinillit suli qaangiutinngitsut Kalaallit Nunaannut uterlutik nuuttut qinersisinnaatitaanertik piginnassavaat.

**§ 3.** Kinaluunniit qinersisinnaasut allattorsimaffiannut ilanngunneqarsimatinnani qinersisinnaatitaanngilaq.

#### *Qinigaasinnaatitaaneq*

**§ 4.** Inatsisartunut qinigaasinnaatitaavoq kinaluunniit § 1, aamma tak. § 2, naapertorlugu tassunga qinersisinnaatitaasoq, pineqartoq inaarutaasumik eqqartuussinikkut akiliisitsissutissamilluunniit akuersinikkut pinerluttulerinermi inatsisit tunngavigalugit Inatsisartut Naalakkersuisullu pillugit Inatsisartut inatsisaanni § 3, imm. 2 naapertorlugu nalinginnaasumik isigineqarnermi inatsisartunut ilaasortaanissamut naleqqukkunnaarsitsisumik pineqaatissinneqarsimanngippat.

*Imm. 2.* Kikkut tamarmik qinigaasinnaassuseq apeqquserneqaraluarpalluunniit qinigassanngortissinnaapput.

### **Kapitali 2**

#### *Qinersivik Inatsisartunullu ilaasortat amerlassusii*

**§ 5.** Inatsisartut 31-inik ilaasortaqrput.

*Imm. 2.* Kalaallit Nunaat qinersivik ataasiuvoq.

*Imm. 3.* Qinersivik Kalaallit Nunaata nunap immikkoortuinut kommuneqarfinnullu aggorneqarnera pillugu Inatsisartut inatsisaanni § 2 naapertorlugu kommuninut taasiartorfissanullu agguataarneqarsimavoq.

*Imm. 4.* Sumiiffiit kommunit aggornerisa avataanniittut Kommuneqarfik Sermersuumi taasiartorfissatut atatinneqassapput.

**§ 6.** Inatsisartunut ilaasortat ukiunut sisamanut qinigaasarput, ilaasortallu tamarmik ataatsikkut tunuartarlutik.

*Imm. 2.* Qinigaaffik ullormit qinersiffimmit naatsorsuunneqassaaq.

*Imm. 3.* Ilaasorta qiffissap qinersiviusup ingerlanerani Inatsisartuni ilaasortaajunnaarpat, nammineersinnaajunnaarsitaatinneqarpat imaluunniit toqukkut qimaguppat, ilaasortap pineqartup inaani sinniisussaq isissaaq. Inatsisartut qinigassanngortittoq qinigaasinnaanngitsutut isumaqarfigippassuk, aamma taamaattoqassaaq.

*Imm. 4.* Sinniisussaq pinerluttulerinermut inatsisitigut pineqaatissinneqarsimaneq pissutigalugu qinigaasinnaatitaannginnersoq, Inatsisartut aalajangissavaat, takuuk § 4, imm. 1.

*Imm. 5.* Partiit avataanni qinigassanngortittoq, imm. 3-imi taaneqartut ilaannik pissuteqartumik kattusseqatigiinni ilaanngippat, qinigaanera atorunnaassaaq.

### **Kapitali 3**

#### *Qinersinermut ataatsimiititaliaq, qinersinermik siulersuisut taasisitsinermillu aqutsisut kiisalu qinersinissamut piareersaatit*

### *Qinersinermut ataatsimiititaliaq*

**§ 7.** Naalakkersuisut Qinersinermut ataatsimiititaliamik pilersitsissapput, Inatsisartut inatsisaat manna aamma kommunalbestyrelsinit, nunaqarfinni aqutsisunut ilagiillu sinniisaannut qinersisarnerit pillugit Inatsisartut inatsisaat malillugu suliaassanik Qinersinermut ataatsimiititaliamut suliaassanngortinneqarsimasunik isumaginnittussamik. Naalakkersuisut Qinersinermut ataatsimiititaliamut allattoqarfeqartitsissapput.

*Imm. 2.* Qinersinermut ataatsimiititaliap ilaasortarai Naalakkersuisut Siulittaasuata Naalakkersuisoqarfiani naalakkersuisoqarfinni pisortaneq, siulittaasuusoq, Naalakkersuisuni inatsisilerinermi pisortaq, ilaasortaq ataaseq kommunit peqatigiillutik toqqagaat, biskoppi kiisalu Ilimatusarfinni rektori taakkuluunniit sinniisussaasut. Amerlaqatigiinnik taasisoqartillugu siulittaasup taasinera aalajangiisuussaaq.

*Imm. 3.* Ilaasortaq peqataasinnaanngikkaangat imaluunniit ilaasortaq qinigassanngortippat sinniisussaasut Qinersinermut ataatsimiititaliamut ilaasortanngussaaq.

*Imm. 4.* Qinersinermut ataatsimiititaliap aalajangiineri inaarutaasuupput aamma allaffissornikkut oqartussamut allamut suliaakkunneqarsinnaanatik.

**§ 8.** Qinersineq Qinersinermut ataatsimiititaliamit siulersorneqassaaq.

*Imm. 2.* Qinersinermut ataatsimiititaliaq qinersinermi allattaavimmik, qinersinermut tunngatillugu pingaaruteqarnerusut allattorsimaffianik allattaaveqartassaaq, tassanilu ilanngullugit qinigassanngortittut partiillu nalunaarutigineqartut aammalu qinersinerup naatsorsorneqarnera paasisutissiissutigineqartassapput.

*Imm. 3.* Qinersinermut ataatsimiititaliap piaarnerpaamik qinersinermik siulersuisunut nalunaarutigissavaa ullormi sumi qinersisoqassanersoq aammalu qinigassanngortitanik nalunaarutit qaqugu tunniunneqareersimassanersut.

*Imm. 4.* Qinersinermut ataatsimiititaliaq pisuni immikkut ittuni piginnaatitaavoq Inatsisartut inatsisaanni matumani aalajangersakkat sanioqqussinnaanissaannut, taakku pissutsit, tassungalu ilanngullugu silap pissusia, malillugit pisariaqartutut isigineqarpata, tamatumanilu qinersinerup isertuussassaanerata qinersinerullu ingerlanneqarnerata nakkutigisaanerata tamatigit isumannaarneqarsimanissaat suli qularnaarneqarsimappata. Qinersinermut ataatsimiititaliap qinersinermi allattaavimmi immersukkamini saneqqutsisimanerit nassuiaateqarfigissavai.

### *Qinersinermik siulersuisut*

**§ 9.** Qinersineq kommunini tamani qinersinermik siulersuisunit piareersarneqarlunilu aqunneqassaaq. Qinersinermik siulersuisut qinersinerup piareersarneqarnera kommunimi allattoqarfimmut isumagissanngortissinnaavaat.

*Imm. 2.* Qinersinermik siulersuisunut ilaasortaassapput borgmesteri, siulittaasuusoq kiisalu kommunalbestyrelsimut ilaasortat marluk qanoq amerlatigisunik ilaasortaatitaqarneq tunngavigalugu kommunalbestyrelsimi qinikkat. Kommunalborgbestyrelsimi ilaasortaataqatigiit pineqartumik toqqaasimasut sinniisussamik toqqaassapput.

*Imm. 3.* Qinersinermik siulersuisunut ilaasortaq qinigassanngortippat ilaasortaq pineqartooq qinersinermik siulersuisunut ilaasortatut tunuassaaq sinniisussatullu toqqagaq qinersinermik siulersuisunut ilaasortanngorluni. Kommunalbestyrelsimi ilaasortaaqatigiit pineqartumik toqqaasimasut akunnerminni sinniisussamik nutaamik toqqaassapput.

*Imm. 4.* Borgmesteri qinersinermik siulersuisunit tunuarpat qinersinermik siulersuisut ilaasortamik akornannit siulittaasussaminnik nutaamik toqqaassapput. Siulittaasup nutaap sinniisussaa qinersinermik siulersuisunut ilaasortanngussaaq, kommunalbestyrelsimilu ilaasortaaqatigiit pineqartumik toqqaasimasut akunnerminni sinniisussamik nutaamik toqqaassallutik.

*Imm. 5.* Qinersinermik siulersuisunut ilaasortatut toqqarneqartut atuuffimmut akuersinissaminnut pisussaaffeqarput.

#### *Taasisitsinermi aqutsisoq*

**§ 10.** Qinersinermik siulersuisut kommunimi taasiartorfissanut ataasiakkaanut tamanut inummik qinersisinnaatitaasunik taasiartorfissani pineqartuni taasisitsinermi aqutsisussamik, pisariaqarpallu taasisitsinermi aqutsisumut ikiuuttussanik toqqaassapput. Taasisitsinermi aqutsisoq qinersinissamut qinigassanngorteqqusaanngilaq.

*Imm. 2.* Taasisitsinermi aqutsisussatut toqqarneqartut qinersisartullu ikiuuttussatut toqqarneqartut atuuffimmut akuersinissaminnut pisussaaffeqarput.

*Imm. 3.* Kommunalbestyrelse taasisitsinermi aqutsisumut qinersisartunullu ikiuuttussatut toqqarneqartunut ullormusiaqartitsissaaq. Kommunit aquneqarnerat pillugu Inatsisartut inatsisaanni malittarisassat malillugit ullormusiaqartitsisoqartassaaq. Ullormusiaqartitsisoqassanngitsoq kommunalbestyrelsip aalajangersinnaavaa.

#### *Qinersinissamut piareersarnej*

**§ 11.** Qinersinermik siulersuisut § 8, imm. 3 naapertorlugu Qinersinermut ataatsimiititaliamit nalunaarut naapertorlugu piffissaq taasiffissaq piaarnerpaamik nalunaarutigisassavaat. Tamatumunnga peqatigitillugu taasiartorfissat ataasiakkaat inuillu taasiartorfissani ataasiakkaani taasisitsinermi aqutsisussatut toqqarneqarsimasut aqqi tamanut nalunaarutigineqassapput. Tamatuma saniatigut qinigassanngortitanik nalunaaruteqarnissamut piffissarititaq tamanut nalunaarutigineqassaaq.

*Imm. 2.* Qinersinermik siulersuisut taasisitsinermillu aqutsisut qinersinermi allattaaveqassapput, tassanilu § 51 naapertorlugu qinersinermut tunngatillugu pingaaruteqarnerit allattorneqassallutik.

*Imm. 3.* Naalakkersuisut Qinersinermut ataatsimiititaliamit akuerineqarlutik qinersinermik siulersuisut taasisitsinermillu aqutsisut qinersinermi allattaaviisa imarisassaat qanorlu iluseqarnissaat pillugit kiisalu pappiarat taasiviit atorsinnaannginnerannut aalajangiinissamut piumasaqaatit pillugit malittarisassanik sukumiinerusunik aalajangersaasinnaapput.

*Imm. 4.* Taasisitsinermi aqutsisut taasivissap ammannginnerani init taasiviusussat Inatsisartut inatsisaanni matumani aalajangersarneqarsimasut piumasaqaatit naapertorlugit aaqquissuuneqarsimanissaat, taamatullu aamma qinersisinnaasut allattorsimaffiata, sillimmatitut pappiarat taasivissat taasivissallu pigineqarnissaat qularnaassavaa. Qinersiviup ammarneqarnerani pappiarat taasivissat pigineqanngippata, sillimmatitut pappiarat taasivissat atorneqassapput.

*Imm. 5.* Imm. 1 naapertorlugu tamanut nalunaaruteqarneq tamanut ammasumik allagarsiinikkut qinersinermillu siulersuisut aalajangiinerat malillugit aamma pisinnaavoq. Qinersinermik siulersuisut aalajangersinnaavaat tamanut nalunaarutiginninneq kommunip nittartagaatigut pisinnaasoq.

#### **Kapitali 4**

##### *Partiit qinigassanngortittullu qinersinermi peqataasinnaatitaasut*

##### *Partiit peqataasinnaatitaasut*

**§ 12.** Inatsisartunut qinersinissaq suaarutigineqarpat, Inatsisartunut Siulittaasup partiit sorliit Inatsisartunut qinersinermut qinigassanngortitsinissamut imm. 2 malillugu piumasaqaatit naammassisimaneraat, Qinersinermut ataatsimiititaliaq nalunaarfigissavaa.

*Imm. 2.* Inatsisartunut qinersinermi qinigassanngortitsinissanaatitaapput partiit, Inatsisartunut kingullermik qinersinermi Inatsisartuni sinniisuutitaqalersut.

*Imm. 3.* Inatsisartunut qinersinermi aammattaaq peqataasinnaatitaapput partiit qinersineq kingusinnerpaamik sapaatit akunnerinik tallimanik sioqqullugu qinersisartunik ikinnerpaamik Inatsisartunut qinersinermi kingullermi taasinerit atorsinnaatitaasut tamavimmik 1/31-iisa nalinginit amerlassuseqartunit Qinersinermut ataatsimiititaliamut nalunaarutigineqartut.

*Imm. 4.* Partiimik nalunaarutiginninneq Qinersinermut siulersuisunut pissaaq qinersisartunillu partiimik nalunaarutiginnittut uppersaatatit allagaannik ilaqartinneqassalluni.

*Imm. 5.* Uppersaatatit allakkami ilanngullugit nalunaarutigineqartassapput qinersisartup aqqi tamarmiusut, inuua inunnillu nalunaarsuisarfik malillugu najugaa kiisalu qinersisartumit namminermit atsiugaallutillu ulluligaasimassallutik.

*Imm. 6.* Uppersaatatit allakkani taamatuttaaq ilanngullugu allasimasassaaq qinersisartup Inatsisartunut qinersinissanaanermut piumasarineqartunik naammassinissimaneranik kommunip pineqartup uppersaataa.

*Imm. 7.* Uppersaatatit allakkat nalunaarutiginninneq ukioq ataaseq sinnerlugu allanneqarsimasut naatsorsuutigineqarsinnaanngillat. Tamanna aamma atuuppoq qinersisartunit qaammatit aqqaneq-marluk iluanni partiinik ataatsimit amerlanerusunik nalunaarutiginninnernut peqataasunit uppersaatatit allakkanut.

*Imm. 8.* Qinersinermut ataatsimiititaliap partiimik akuerinninnera Inatsisartunut qinersisoqareernissaata tungaanut atuutissaaq. Atuunnerali sivikinnerpaamik ukiumi ataatsimi atuutissaaq.

*Imm. 9.* Naalakkersuisut Qinersinermut ataatsimiititaliamit akuerineqarlutik uppersaatatit allakkat ilusilersorneqarnerat pillugu aalajangersakkanik sukumiinerusunik aalajangersaasinnaapput.

*Imm. 10.* Naalakkersuisut partiinik nalunaarutiginninnermi suleriaasissaq pillugu, ilaatigut qarasaasiatigut nalunaarutiginninneq, uppersaatatit allakkat katersorneqarneranni suleriaasissaq aamma kommunit uppersaasiinerini suleriaasissaq pillugit aalajangersakkanik sukumiinerusunik aalajangersaasinnaavoq.

##### *Qinigassanngortissinnaatitaasut*

**§ 13.** Qinersinermut qinigassanngortissinnaatitaapput § 14 naapertorlugu partii sinnerlugu qinigassanngortittut, § 15 naapertorlugulu partiit avataasigut qinigassanngortittut.

**§ 14.** Partii sinnerlugu qinigassanngortittut nalunaarutigineqarnerat Qinersinermik ataatsimiititaliap partiinut nalunaarsuiffissatut allaffissiaatigut pissaaq. Nalunaarut Qinersinermik siulersuisunut tunniunneqareersimasassaaq kingusinnerpaamik qinersinissaq sapaatit akunnerinik pingasunik sioqqullugu nal. 12:00.

*Imm. 2.* Partiip ataatsip qinerneqartussat amerlanerpaamik marloriaataat qinigassanngortissinnaavai.

*Imm. 3.* Partiitut qinigassanngortinnermut nalunaarsuiffik qinigassanngortittut aqqi, inuuii najugaallu pillugit paasissutissanik imaqassaaq. Qinigassanngortittut qinersinissamut qinigassanngortinnertik, taamatullu pinerluttulerinermi inatsisit tunngavigalugit pineqaatissinneqarsimasinnaaneri pillugit paasissutissanik pissarsiniaasoqarsinnaasoq namminneq atsiorlutik uppersarsimasassavaat. Nalunaarummi namminermi imaluunniit taassuma assilineqarnerani atsiortoqarsinnaavoq.

*Imm. 4.* Qinigassanngortittup atini tamaasa pappiarami taasivissami allanneqannginnissaat kissaatiguniuk, ateq qanoq allanneqassanersoq kissaatiginerlugu nalunaarutigineqassaaq. Qinigassanngortittup naggataa aqqaluunniit taaguutaanngitsoq kiisalu minnerpaamik ateq siulequt naqinnerluunniit aallaqqaataasoq ataaseq tamatigut allassimasassapput. Taaguut aamma ateq siulequt taarserlugu ilassutitulluunniit allanneqarsinnaavoq. Qinigassanngortittut atinik aammalu taaguutaannik assigiittoqartillugu atip allassimasussap allannngortinneqarnissaa Qinersinermut ataatsimiititaliap aalajangersinnaavaa.

*Imm. 5.* Aqqit taaguutit akornanni aternik assigiittoqartillugu imaluunniit taaguut kissaatigineqartoq qinigassanngortittup kinaaneraniq nalogngisitsisinnappat aternik taaguummik atuisoqarnissaa Qinersinermut ataatsimiititaliap itigartissinnaavaa.

*Imm. 6.* Partiitut qinigassanngortinnermut nalunaarsuiffik partiimi oqartussaasunit, partiip malittarisassai malillugit Inatsisartunut qinersinermut qinigassanngortitsinissamut akuerineqarsimasunit, atsiorneqarsimassaaq. Partiit qinigassanngortittunik qinigassanngortitsinermik akuersissutaat partiinut nalunaarsuiffiit assilinerisa, atsiornernik uniffik siullermi taaneqartunik ilaqartillugit, nassiunneqarnerisigut pisinnaapput.

*Imm. 7.* Partiitut qinigassanngortinnermut nalunaarsuiffiit qanoq isikkoqarnissaat aamma partiitut qinigassanngortitsinermut nalunaarsuiffiit nassiunneqarneranni periaasissaq, qarasaasiatigut nalunaarutiginnissinnaaneq ilanngullugu, pillugu aalajangersakkanik sukumiinerusunik Naalakkersuisut aalajangersaasinnaapput.

*Imm. 8.* Naalakkersuisut partiimik tunuliaquteqarlutik qinigassanngortittunik nalunaarutiginninnermi suleriaasissaq pillugu, ilaatigut qarasaasiatigut nalunaarutiginninneq, aalajangersakkanik sukumiinerusunik aalajangersaasinnaavoq.

**§ 15.** Partiit avataatigut qinigassanngortittut nalunaarutigineqarnerat Qinersinermik ataatsimiititaliap qinigassanngortittunik nalunaarsuiffissatut allaffissiaatigut pissaaq. Nalunaarutiginninneq Qinersinermi siulersuisunut tunniunneqareersimassalluni kingusinnerpaamik qinersinissaq sapaatit akunnerinik pingasunik sioqqullugu nal. 12:00.

*Imm. 2.* Qinigassanngortittunik nalunaarsuiffik qinigassanngortittut aqqi, inuuii najugaallu pillugit paasissutissanik imaqassaaq kiisalu katusseqatigiittoqartarpat tamanna nalunaarneqassalluni. Qinigassanngortittut qinersinissamut qinigassanngortinnertik, taamatullu aamma pinerluttulerinermi inatsisit tunngavigalugit pineqaatissinneqarsimasinnaaneri pillugit paasissutissanik

pissarsiniaasoqarsinnaasoq namminneq atsiorlutik uppersarsimasassavaat. Nalunaarummi namminerimi imaluunniit taassuma assilineqarnerani atsiortoqarsinnaavoq.

*Imm. 3.* Qinigassanngortittup aqqi tamaasa pappiarami taasivissami allanneqannginnissaat kissaatiguniuk, ateq qanoq allanneqassanersoq kissaatiginerlugu nalunaarutigissavaa. Qinigassanngortittup naggataa aqqaluunniit taaguutaanngitsoq kiisalu minnerpaamik ateq siulequt naqinnerluunniit aallaqqaataasoq ataaseq tamatigut allassimasassapput. Taaguut aamma ateq siulequt taarserlugu ilassutitulluunniit allanneqarsinnaavoq. Qinigassanngortittut atiiniq aammalu taaguutaannik assigiittoqartillugu atip allassimasussap allanngortinneqarnissaa Qinersinermut ataatsimiititaliap aalajangersinnaavaa.

*Imm. 4.* Aqqit taaguutit akornanni atermik assigiittoqartillugu imaluunniit taaguut kissaatigineqartoq qinigassanngortittup kinaaneraniq nalornisitsinnaappat atermik taaguummik atuisoqarnissaa Qinersinermut ataatsimiititaliap itigartissinnaavaa.

*Imm. 5.* Qinigassanngortittunik nalunaarsuiffiit qanoq isikkoqarnissaa aamma qinigassanngortittunik nalunaarutiginninnerit nassiunneqarneranni periaasissaa, qarasaasiatigut nalunaarutiginninneq ilanngullugu, pillugu aalajangersakkanik sukumiinerusunik Naalakkersuisut aalajangersaasinnaapput.

**§ 16.** Partiit avataatigut qinigassanngortittut marluk amerlanerusulluunniit kattusseqatigiinnikkut tapersersoqatigiinniarlutik isumaqatigiissinnaapput. Qinigassanngortitap qinigassanngortitaaq alla ataaseq amerlanerusulluunniit kattusseqatigisimappagit nalunaarummi tamanna taaneqarsimassaaq. Qinigassanngortitat kattusseqateqarnissartik atsiorlutik akuersissutigisimassavaat. Akuersissutit nalunaarummi namminerimi taassumaluunniit assilinerini nalunaarutigineqarsinnaapput.

**§ 17.** Partiit avataatigut qinigassanngortittut nalunaarutigineqarneri qinersisartunit, qinigassanngortittussamik inassutiginnittunit, ikinnerpaamik 40-nit atsiorneqarsimassapput. Atsiornerit nalunaarummi namminerimiissinnaapput taassumalluunniit assilineraniissinnaallutik.

*Imm. 2.* Nalunaarummi allassimassapput qinigassanngortitsisut tamarmik immikkut aqqi, inuuii najugaallu.

*Imm. 3.* Qinigassanngortitsisut ilaat ataaseq nalunaarut pillugu qinigassanngortitsisut tamaasa sinnerlugit saaffiginnissuteqarfigineqarsinnaasutut taaneqarsimassaaq. Qinigassanngortitsisut aqqi qinersisartumit kimilluunniit piumasarineqarpata qinersinermik siulersuisunit qinigassanngortittut nalunaarutigineqarnerannik tigusisimasunit nalunaarutigineqassapput.

*Imm. 4.* Naalakkersuisut partiimik tunuliaquteqarnatik qinigassanngortittunik nalunaarutiginninnermi suleriaasissaaq pillugu, ilaatigut qarasaasiatigut nalunaarutiginninneq, aalajangersakkanik sukumiinerusunik aalajangersaasinnaavoq.

**§ 18.** Kinaluunniit partiinut ataatsimit amerlanerusunut qinigassanngortissinnaanngilaq imaluunniit partiimut qinigassanngortitigaluni partiit avataasigut qinigassanngortissinnaanani.

*Imm. 2.* Qinigassanngortitaaq ataaseq kattusseqatigiinni arlalinni peqataasinnaanngilaq. Partii sinnerlugu qinigassanngortitat qinigassanngortitanik allanik kattusseqateqarsinnaanngillat.

*Imm. 3.* Kinaluunniit qinigassanngortittunut arlalinut qinigassanngortitsisuusinnaanngilaq.

**§ 19.** Qinigassanngortittup qinigassanngortinnermik nalunaarut tunniunneqareersimasoq qinersinermik siulersuisunut qinersinissaq kingusinnerpaamik sapaatit akunnerinik pingasunik nal. 12:00 sioqqullugu saaffiginninnermigut tunuartissinnaavaa.

*Imm. 2.* Qinersisartup § 17, imm. 1 naapertorlugu qinigassanngortittumik qinigassanngortitseqataasimasup qinigassanngortitseqataassutini utertissinnaangilaa qinigassanngortitsinermik nalunaarut qinersinermik siulersuisunut tunniunneqareersimappat.

**§ 20.** Qinersinermik siulersuisut § 14, imm. 1 aamma § 15, imm. 1 naapertorlugit qinigassanngortitanik nalunaaruteqarnissamut piffissaliussaq naaniariarpat pilertornerpaamik partiit allassimaffiannut nalunaarutit aamma qinigassanngortitanik nalunaarutit tigumasatik allakkatigut Qinersinermut ataatsimiititaliamut nalunaarutigissavaat kiisalu qinersinermik siulersuisut isumaat malillugu nalunaarutit §§ 14-imiit 18-imut piumasaasunik naammassinninersut paasisutissiissutigalugu. Qinigassanngortitanik nalunaarutini tamatuma saniatigut Qinersinermik siulersuisut qinigassanngortittussatut akuerineqartut amerlassusaat allassavaat.

*Imm. 2.* Qinersinermut ataatsimiititaliap qinersinermik siulersuisunit nalunaarut tigoreeruniuk Qinersinermut ataatsimiititaliap aalajangissavaa nalunaarutit tiguneqarsimasut atorsinnaasutut akuerineqarsinnaanersut. Qinigassanngortitap nalunaarutigineqarnerani kukkuneqarsimappat Qinersinermut ataatsimiititaliap pineqartoq kukkunerup iluarsineqarnissaanut ulluinnarnik marlunnik piffissalissavaa.

*Imm. 3.* Qinersinermut ataatsimiititaliap qinigassanngortittut akuerisat aqqi piaarnerpaamik tamanut nalunaarutigissavai. Qinigassanngortittoq partii sinnerlugu qinigassanngortippat imaluunniit qinigassanngortittut arlallit kattusseqatigiissimappata, nalunaarummi tamanna taaneqassaaq. Qinersinermut ataatsimiititaliaq qinigassanngortittut pillugit qinersinermik siulersuisunut nalunaaruteqassaaq, taakkulu taasisitsinermik aqutsisunut pilertornerpaamik ilisimatitsissapput.

*Imm. 4.* Qinersinermik siulersuisut aalajangiinerat malillugu qinigassanngortittut aqqi tamanut saqqummiunneqassapput.

**§ 21.** Qinigassanngortitanik nalunaaruteqarnissamut piffissaliussap naanerani qinigassanngortitat Inatsisartunut ilaasortassatut qinerneqartussaniit ikinnerusut nalunaarutigineqarsimappata Qinersinermut ataatsimiititaliap qinersisartut kajumissaassavai piffissaq erseqqinnerusumik taasaaq naatinnagu qinigassanngortitanik amerlanerusunik nalunaarutiginneqqullugit.

## **Kapitali 5**

### *Qinersisinnaatitaasut allattorsimaffiat*

**§ 22.** Qinersinermik siulersuisut inuit kingusinnerpaamik ullormi qinersivissami §§ 1 aamma 2 naapertorlugit qinersisinnaatitaasutut piumasaqaatinik naammassinnittut, aammalu Inunnut Nalunaarsuutit Eqiteruffianni kommunimi pineqartumi najugaqarlutik nalunaarsimasut allattorsimaffiannik suliaqassaaq, taamaattoorli § 24 takuuk.

*Imm. 2.* Qinersisinnaasut allattorsimaffianni ilaatinneqassapput inuit qinersinissaq sioqqullugu kingusinnerpaamik sapaatit akunnerit arfinillit kommunimut nuussimasut aammalu kingusinnerpaamik ulloq taanna nuunnerminnik Inunnut Nalunaarsuutit Eqiteruffiannut nalunaaruteqarsimasut.



*Imm. 3.* Qinersisartut qinersinissaq sioqqullugu kingusinnerpaamik sapaatit akunnerit arfinillit kommunip iluani nuussimasut aammalu kingusinnerpaamik ulloq taanna nuunnerminnik Inunnut Nalunaarsuutit Eqiteruffiannut nalunaaruteqarsimasut najugarilikkaminni allassimallutik qinersisinnaasut allattorsimaffiannut ilanngunneqassapput.

*Imm. 4.* Qinersisartut qinersinissaq sioqqullugu kingusinnerpaamik sap. akunnerisa arfinillit iluanni kommunimut allamut nuussimasut imaluunniit kommunip iluani allamut nuussimasut imaluunniit nuunnissaminnik kingusinnerpaamik ulloq taanna nalunaaruteqarsimasut ulloq taanna tikillugu najugarisimasaminni najugalittut qinersisinnaasut allattorsimaffianni nalunaarsorneqarsimaannassapput.

*Imm. 5.* Qinersisartut Kalaallit Nunaata avataani najugaqarallartut § 2-milu piumasaqaatinik naammassinnittut § 24 naapertorlugu ulloq qinersivissaq kingusinnerpaamik sapaatit akunnerinik pingasunik sioqqullugu tamanna pillugu aalajangiisoqarsimappat qinersisinnaasut allattorsimaffiannut ilanngunneqassapput.

**§ 23.** Inuit sumiiffinni Kalaallit Nunaata kommuninut aggorneqarnerata avataanniittut ullormilu qinersivissami qinersisinnaatitaasut, kommunimi aalajangersimasumik najugartik attatiinnarsimangikkunikku Kommuneqarfik Sermersuumi qinersisinnaasut allattorsimaffianni immikkoortumi immikkut ittumik ilanngunneqassapput.

*Imm. 2.* Inuit qinersisartut allattorsimaffiannut ilanngunneqareernerminni Kalaallit Nunaanni aalajangersimasumik najugaqarnerminnik unitsitsisut qinersinermik siulersuisunit qinersisinnaasut allattorsimaffiannit peerneqassapput, taamaattoq takukkit § 24, imm. 1-3.

*Imm. 3.* Qinersisinnaasut allattorsimaffiisa suliarineqartarnerat pillugu aalajangersakkanik sukumiinerusunik Naalakkersuisut aalajangersaasinnaapput, ilanngullugit qinersisinnaasut allattorsimaffi digitalinngorlugit.

**§ 24.** Qinersisartut § 2-mi pineqartut qinersisinnaasut allattorsimaffiannut ilanngunneqassapput imaluunniit kingullermik qitiusumik inuit nalunaarsorsimaffianni, Det Centrale Personregisterimi, nalunaarfigisimasaminni qinersisartut allattorsimaffiannut ilaatinneqaannassallutik. Qinersisinnaasut allattorsimaffiannut ilanngunneqarnissamik qinnuteqaat kommunimi tassani qinersinermik siulersuisunut imaluunniit kommunit aggorneqarnerisa avataaniikkaanni Kommuneqarfik Sermersuumut tunniunneqassaaq.

*Imm. 2.* Imm. 1 malillugu qinersisinnaasut allattorsimaffiannut ilanngunneqarnermik aalajangiineq ullormit aalajangiinerup ulluanit naatsorsorlugu ukiuni marlunni atuutissaaq.

*Imm. 3.* Qinersisartuq imm. 1 malillugu qinersisinnaasut nalunaarsorsimaffiannut ilanngunneqarsimasooq piffissaliussap imm. 2-mi taaneqartutut naannginnerani qinersisinnaasut allattorsimaffiannut nutaamik ilanngunneqarnissaminik qinnuteqarpat aalajangiisoqarnissaata tungaanut piffissaq sivitsorneqassaaq.

*Imm. 4.* Imm. 1 naapertorlugu Qinersinermik siulersuisut aalajangiineri sapaatit akunnerinik marlunnik piffissaliussap iluani Qinersinermut ataatsimiititaliamut suliassanngortinneqarsinnaapput.

*Imm. 5.* Qinnuteqaatip tunniunneqarnissaa suliarineqarnissaalu pillugit aalajangersakkanik erseqqinnerusunik Naalakkersuisut aalajangersaasinnaapput, ilanngullugu digitalimik qinnuteqaatit.

**§ 25.** Qinersisinnaasut allattorsimaffiat kommuninit tamanit immikkut suliarineqassaaq. Qinersisinnaasut allattorsimaffiat taasiartorfissanut tamanut immikkut immikkoortulerlugu suliarineqassaaq.

*Imm. 2. Qinersisinnaasut allattorsimaffiat qinersisartut aqqinik qinersisartullu inuuiinik kiisalu qinersisartut aqqinik krydsiliiffissamik imaqassaaq.*

**§ 26.** Qinersisinnaasut allattorsimaffiat kingusinnerpaamik ulloq qinersivissaq sapaatit akunnerinik pingasunik sioqqullugu kommunimi sumiiffimmi tamanit tikinneqarsinnaasumi minnerpaamik ulluinnarni marlunni saqqumitinneqassaaq.

*Imm. 2. Qinersisinnaasut allattorsimaffiat saqqummiunneqartoq, kommunip iluani taasiartorfissanik tamaginnik imaqassaaq. Tamatuma saniatigut kommunimi taasiartorfissani tamani qinersisinnaasut allattorsimaffiat taasiartorfissamut pineqartumut atuuttoq saqqumitinneqassaaq.*

*Imm. 3. Sumiiffiit kommunit aggornerisa avataanniittut eqqarsaatigalugit qinersisinnaasut allattorsimaffiata sumiiffimmut tunngasortaa kingusinnerpaamik ulloq qinersiviusussaq sapaatit akunnerinik pingasunik sioqqullugu minnerpaamik ulluinnarni marlunni saqqumitinneqassaaq.*

*Imm. 4. Qinersinermik siulersuisut aalajangersinnaavaat qinersisinnaasut allattorsimaffiat taamaallaat kommunip nittartagaatigut tamanut saqqummiunneqassasoq. Qinersisinnaasut allattorsimaffiat inuit normuinik imaqaqusaanngilaq.*

**§ 27.** Kinaluunniit isumaqartoq nammineq pissutissaqanngitsumik allattorsimaffimmut ilanngunneqarsimanani ilanngunneqarsimallunuunniit kingusinnerpaamik ulloq qinersivissaq sapaatit akunnerinik marlunnik sioqqullugu qinersinermik siulersuisunut naammagittaalliuuteqarsinnaavoq. Naammagittaalliuut allakkatiguussaaq tunngavilersuummillu naatsumik ilaqartinneqarluni.

*Imm. 2. Qinersinermik siulersuisut naammagittaalliuutit tiguneqartut sapinngisamik piaarnerpaamik suliarissavaat.*

*Imm. 3. Kikkunnut tamanut qinersisussat allattorsimaffiannit peerneqartunut imaluunniit namminneq ilanngunneqarsimannginnerminnik naammagittaalliumminni ilalerneqanngitsunut qinersinermik siulersuisut allakkatigut nalunaaruteqassapput.*

*Imm. 4. Qinersinermut siulersut aalajangiinera tamanna pillugu nalunaaruteqartoqarnerata kingorna ulluinnat marluk qaangiutinnginneranni Qinersinermut ataatsimiititaliamut maalaaruteqarsinnaavoq. Maalaarut allakkatiguussaaq tunngavilersuummillu naatsumik ilaqartinneqarluni.*

*Imm. 5. Qinersinermut ataatsimiititaliap maalaarut tiguneqartoq sapinngisamik piaarnerpaamik suliarissavaa.*

*Imm. 6. Qinersisinnaasut allattorsimaffianni allannguutit allat taamaallaat pisinnaapput qinersinermik siulersuisunit akuerineqarsimagunik.*

## **Kapitali 6**

### *Qarasaasiakkut allakkatigut taasineq*

**§ 28.** Allakkatigut taasineq digitalimik pisinnaasoq pillugu aalajangersakkanik erseqqinnerusunik Naalakkersuisut aalajangersaasinnaapput. Digitalimik allakkatigut taasinissamut periarfissaq taamaallaat taasisinnaanissamut imaluunniit sioqqutsilluni taasisinnaanissamut annertusititsinerussaaq.

**§ 29.** Digitalimik allakkatigut taasinerup aaqqissuunneqarnera, ingerlanneqarnera immaqalu taasineq pillugit aalajangersakkanik erseqqinnerusunik Naalakkersuisut aalajangersaasinnaapput.

*Imm. 2.* Paasissutissat nalunaarsukkat, digitalimik allakkatigut taasinerit uninngasuutigineranni saqqummertut, piiarnissaat, pissarsiarinissaat atorineqarnissaallu pillugu aalajangersakkanik erseqqinnerusunik Naalakkersuisut aalajangersaasinnaapput.

**§ 30.** Digitalimik allakkatigut taasinerit atugassanik digitalimik periaatsinik Naalakkersuisut pilersitsissapput aammalu ingerlanneqarneranut akisussaasuussallutik. Digitalimik aaqqiissutissaq Qinersinerit ataatsimiititaliamit akuerineqarsimassaaq.

**§ 31.** Digitalimik periaatsimi taaguut "Inatsisartunut qinersineq" aamma "Valg til Inatsisartut" allassimassapput.

*Imm. 2.* Digitalimik periaatsimi qinigassanngortittut aqqi allassimassapput. § 14, imm. 4 aamma 5 kiisalu § 15, imm. 3 aamma 4 taamaaqataanik atuutissapput.

**§ 32.** Digitalimik allakkatigut taasisinnaanngilaq:

- 1) qinersisartoq ulloq qinersivissaq tikitsinnagu toqukkut qimagussimasoq,
- 2) digitalimik allakkatigut taasinissamut periaasissaq maleruqaqquneqartoq malinneqarsimanngippat,
- 3) qinersisartoq sioqqutsisumik taasisimappat, imaluunniit
- 4) qinersisartoq ullormi qinersivissami taasisimappat.

## **Kapitali 7**

*Sioqqutsisumik taasinerit kisitsinerit aamma digitalimik allakkatigut taasinerit qitiusumut inissinneqarnerat*

**§ 33.** Digitalimik allakkatigut taasisinnaanermut periarfissap atuutsinneqalerneranut atatillugu, takuuk § 28, imm. 1, sioqqutsisumik taasinerit kisitsinerit aamma digitalimik allakkatigut taasinerit qitiusumut inissinneqarnissaat pillugu aalajangersakkanik erseqqinnerusunik Naalakkersuisut aalajangersaasinnaapput.

*Imm. 2.* Sioqqutsisumik taasinerit kisitsinerit aamma digitalimik allakkatigut taasinerit qitiusumut inissinneqarnerannut atatillugu, sioqqutsisumik taasinerit kisitsinerit aamma digitalimik allakkatigut taasinerit periaasissat pillugit aalajangersakkanik erseqqinnerusunik Naalakkersuisut aalajangersaasinnaapput. Ilanngullugu sioqqutsisumik taasinerit sumut nassiunneqassanersut aammalu qinersinerit siulersuisunut ataasiakkaanut kisitsinerit inernerit pillugit ilisimatitsissuteqarnermi periaasissat pillugit aalajangersakkanik erseqqinnerusunik Naalakkersuisut aalajangersaasinnaapput.

*Imm. 3.* Sioqqutsisumik taasinerit kisitsinerit qitiusumut inissinneqarneranni §§ 46-48 aamma § 49, imm. 2, §§ 50-52 aamma § 58 taamaaqataanik atuutissapput, taamaattoq karsit taasiviit atorineqassanatik.

## **Kapitali 8**

*Sioqqutsisumik taasinnikkut taasineq*

**§ 34.** Qinersisartoq kinaluunniit Kalaallit Nunaanni kommunini tamani innuttaasut nalunaarsorsimaffianni sioqqutsisumik taasisinnaavoq.

**§ 35.** Qinersisartut napparsimmavimmi imaluunniit peqqissartarfinni paaqqinnittarfinniluunniit allani uninngasut, napparsimmavimmi uninngaffigisaminniluunniit sioqqutsisumik taasisinnaapput.

*Imm. 2.* Qinersisartut pinerluuteqarsimasunik isumaginnittoqarfup inissiisarfiani inissinneqarsimasut inissinneqarfigisaminni sioqqutsisumik taasisinnaapput.

*Imm. 3.* Qinersisartut sumiiffinni avinngarusimasuni immikkut taasiartorfiunngitsuniittut inummut qinersisinnaatitaasumut qinersinermik siulersuisunit susassaqtunit toqqarneqarsimasumut sioqqutsisumik taasisinnaapput.

*Imm. 4.* Qinersisartut kommunit aggornerisa avataanni mittarfinniittut, silasiorfinniittut il.il. inummut Qinersinermut ataatsimiititaliamit piginnaatinneqartumut sioqqutsisumik taasisinnaapput.

*Imm. 5.* Qinersisartut naalagaaffiup ilaani allaniittut innuttaasunut sullissisarfimmi imaluunniit susassaqtumi Qinersinermut ataatsimiititaliamit piginnaatinneqarsimasumi sioqqutsisumik taasisinnaapput.

*Imm. 6.* Qinersisartut naalagaaffiup avataaniittut Kalaallit Nunaata sinniisoqarfianut imaluunniit qallunaat aallartitaqarfiini sinniisoqarfiniluunniit sioqqutsisumik taasisinnaapput.

*Imm. 7.* Qinersisartut umiarsuarni Kalaallit Nunaanni angerlarsimaffeqartuniittut umiarsuup naalagaanut inummulluunniit taassuma toqqagaanut sioqqutsisumik taasisinnaapput. Qinersisartut sioqqutsisumik taasinissamik kissaateqartut, tamatumunnga periarfissaqarnissaat, umiarsuup naalagaata qulakkiissavaa.

*Imm. 8.* Sioqqutsisumik taasineq siusinnerpaamik qinersinerup ingerlanneqarnissaa sapaatit akunnerinik arfinilinnik sioqqullugu pisinnaavoq.

*Imm. 9.* Imm. 1-7 naapertorlugit sioqqutsisumik taasisarneq pillugu aalajangersakkanik sukumiinerusunik Naalakkersuisut aalajangersaasinnaapput.

**§ 36.** Qinersisartut napparsimanertik angallarunnertilluunniit pissutigalugu taasivissamukarsinnaanngitsut angerlarsimaffimminni sioqqutsisumik taasisinnaapput, sumiiffinni § 35-mi taaneqartuni taasinissaminnut periarfissaqanngikkunik. Angerlarsimaffimmi sioqqutsisumik taasinissaq pillugu qinersinermut siulersuisunut qinnuteqartoqareersimassaaq kingusinnerpaamik ulloq taasivissaq ullunik pingasunik sioqqullugu nal. 16:00.

*Imm. 2.* Sioqqutsisumik taasinernik kisitsinerit aamma digitalimik allakkatigut taasinernit qitiusumut inissinneqarnerannut atatillugu sioqqutsisumik taasinissamut piffissamut killissaliussap allanngortinneqarnissaa pillugu aalajangersakkanik erseqqinnerusunik Naalakkersuisut aalajangersaasinnaapput.

**§ 37.** Kalaallit Nunaanni sioqqutsisumik taasinissamut taasinermi atortussat pisariaqartut ilusilersornissaannut akuerinissaannullu Qinersinermut ataatsimiititaliaq akisussaasuvoq.

*Imm. 2.* Kalaallit Nunaata avataani sioqqutsisumik taasinermi allakkatigut taasinermi atortussat Danmarkimi folketingimut qinersisoqarnerani atorneqartartut atorneqassapput.

**§ 38.** Qinersisartuq taasiartorfinni § 35-imi taaneqarsimasut ilaanni taasinernik tigooqqaasussamut saaffiginninnermigut pappiaramik sioqqutsisumik taasivissamik, puussaqlunilu allakkanik nassitsissutitaqlunilu ungaluusartalimmik tunineqassaaq. Qinersisartup allanit isigineqarani pappiara taasivissaq erngerluni immersussavaa partiit qinigassanngortitaqartut qinigassanngortissimasulluunniit arlaata aqqa allallugu.

*Imm. 2.* Qinersisartuq taasereeruni allakkat nassitsissutit immersussavai. Qinersisartup nammineq piumassutsiminik allanillu isigineqarani pappiaramik taasivissamik immersuisimaneramik, puussaanut ikisisimaneramik taassuminngalu matusisimaneramik nalunaarummik allakkat nassitsissutit imaqassapput. Qinersisartup taasinermik tiguisusaaq isigitillugu allakkat nassitsissutissat atsiussavai, allakkanilu nassitsissutini atsiorterup ullua, qinersisartup aqqi tamarmik, inuuia kommunimilu qinersisinnaasut allattorsimaffiannut ilanngunneqarfigisimasamini najugaa taaneqassapput.

*Imm. 3.* Tamatuma saniatigut taasinermik tiguisup qinersisartup atsiorterata ilumoortuuneramik aammalu qinersisartup piffissami sumiiffimmilu taasaani pisimaneramik, kiisalu allanit isigineqarani taasisimaneramik nalunaarummik imaqtartusaaq immersorlugulu ilanngutissavaa. Uppernarsaat taanna taasinermik tiguisumit pineqartumit namminermit ateq, atorfik najugarlu allallugit atsiorneqassaaq.

*Imm. 4.* Taasinernik tiguisoq sioqqutsisumik taasinerup, takuuk imm. 1, allanik najuuttoqartinnagu pinissaanut akisussaasuvoq.

**§ 39.** Puusaaq pappiaramik taasivimmik allakkanillu nassitsissutini kiisalu uppersaammik imalik puussamut tassunga ikisiffissiamut ikineqassaaq, taannalu matuneqassalluni kommunimullu qinersisartup qinersisartut allattorsimaffianni allanneqarfigisimasaanut nassiunneqarluni. Puussap tunuani qinersisartup aqqa kommunimilu taaneqartumi najugaa erseqqissumik allanneqassapput. Taasinermik tiguisup pisariaqanngitsumik kinguarsaanani puusaaq kommunimut pineqartumut nassiutissavaa.

**§ 40.** Kommunip puusaaq nassiunneqarsimasooq ammarnagu ingerlaannaq taasiartorfimmi qinersisartup pineqartup najugaatut puussami taaneqarsimasumi taasisitsinermik aqutsisumut ingerlateqqissavaa. Puussat taasineq naammasittinnagu taasisitsinermik aqutsisumit tiguneqareersimassapput.

*Imm. 2.* Sioqqutsisumik taasinernik kisitsinerit aamma digitalimik allakkatigut taasinerit qitiusumut inissinneqarneranni sioqqutsisumik taasinerit nassiunneqarneranni periaasissaaq aamma piffissamut killiliussat pillugit aalajangersakkanik erseqqinnerusunik Naalakkersuisut aalajangersaasinnaapput.

## Kapitali 9

*Pappiarat taasivissat ilusilersorneqarneri, init taasiviusussat, ullormi qinersiviusumi taasineq*

*Pappiarat taasivissat ilusilersorneqarneri*

**§ 41.** Qinersinermut ataatsimiititaliaq pappiarat taasivissat pisariaqartut pissarsiarinissaannut, ilusilerneqarnissaannut agguataarneqarnissaallu pillugit aalajangiissaaq. Pappiarat taasivissat taaguutini "Inatsisartunut qinersineq" aamma "Valg til Inatsisartut" naqitsivigineqarsimassapput.

*Imm. 2.* Pappiarani taasivissani qinigassanngortittut aqqi allassimassapput. Partiit sinnerlugit qinigassanngortittut immikkoortissimallugit allanneqassapput. Immikkoortitsiffiit pappiarani taasivissani immikkoortillugit inissinneqassapput. Immikkoortitsiffinni tamani partiip taaguutaa siulliulluni allassimassaaq, taassumalu ataani qinigassanngortittut siuliaqutai kinguliaqutaaluunniit naqinnerit tulleriiaarnerisut tulleriiaarlutik allassimassallutik. Immikkoortitsiffinni tamani partiip kalaallisut taaguutaa siulliulluni allassimassaaq, tulleriiaarnerisut tulleriiaarlutik allassimassallutik.

*Imm. 3.* Kattusseqatigiit partiinut qinigassanngortittut kingornisigut allanneqassapput. Kattusseqatigiit arlaliuppata qinigassanngortitamik amerlassusii tunngavigalugit tulleriinneqassapput. Kattusseqatigiit

amerlanernik qinigassanngortitallit siulliutinneqassapput. Tamatuma kingorna kattusseqatigiit amerlanerit tulliiinik amerlassusilinnik qinigassanngortitallit allanneqassapput, taamatullu periuseqarluni tulleriinnilersuisoqassalluni. Kattusseqatigiit amerlaqatigiinnik qinigassanngortitaqarpata Qinersinermut ataatsimiititaliaq qanoq tulleriinneqarnissaat pillugu makitsissaaq. Kattusseqatigiit ataasiakkaat iluini qinigassanngortittut siuliaqutaat kinguliaqutaalluunniit malillugit naqinnerit tulleriiaarnerisut tulleriiaarlugit allassimassapput.

*Imm. 4.* Partiit avataasigut qinigassanngortittut allat kingornisigut allanneqassapput. Partiit avataatigut qinigassanngortittut arlaqarpata taakku siuliaqutaat kinguliaqutaalluunniit malillugit naqinnerit tulleriiaarnerisut tulleriiaarlugit allassimassapput.

#### *Init taasivissat*

**§ 42.** Init taasivissat kiisalu ineeqqat taasivissat karsinillu taasivinnut nakkartitsivissat qinersiartorfissani tamani kommunalbestyrelsip aaqqissussavai.

*Imm. 2.* Ineeraq taasivik imatut aaqqissuunneqarsimassaaq qinersisartoq qanoq taasinersoq allanit takuneqarsinnaajunnaarlugu taasisoqarsinnaassalluni. Ineeraq taasivik naammattumik qaammaqquteqassaaq allannerit erseqqissumik atuarneqarsinnaanissaannut, tulluurtumillu allaataasinnaasumik peqassalluni qanoq taasisoqarneranik nalornisitsisinnaanngitsumik, kiisalu allannermut toqqavissamik aalajangersimasumik peqassalluni.

*Imm. 3.* Ineeqqap taasiviup silataani taasineriut karseqassaaq, taannalu sananeqarsimassaaq pappiarat taasiviit taasineriut karsi ammaqqartinnagu amuneqarsinnaajunnaarlugit. Karsit taasiviit parnaarneqarsinnaallutilluunniit ammarnaveerneqarsinnaassapput.

*Imm. 4.* Inimi taasiviusumi qinersinerup ingerlanneqarnerani qineqqusaartoqassanngilaq. Qinersinissamik sunniinartoqannginnissaa taasisitsineriut aqutsisup taassumaluunniit tamatumunnga pisinnaatitaata sianigissavaa.

#### *Ullormi qinersiviusumi taasineq*

**§ 43.** Qinersineq nal. 09:00 ammarneqassaaq nal. 20:00-lu naammassineqarluni, siusinnerusukkulli naammassineqarsinnaalluni qinersisinnaatitaasut tamarmik nalunaaqutaq taasaaq nallertinnagu taasiartoreersimappata.

**§ 44.** Taasisitsineriut aqutsisup taasinerup aallartinnerani taasineq ammarnerarlugu nalunaarutigissavaa, najuuttullu isigitillugit karsit taasivinnut nakkartitsiviit ammariarlugit imaqqannginnerat takutissallugu, tamatumalu kingorna karsit parnaarneqassallutik ammarneqarsinnaajunnaarlutilluunniit.

*Imm. 2.* Inimi qinersivimmi takulertornartumik inissitamik allagartaqassaaq partiit inuillu qinigassanngortittut aqqi pillugit paasissutissanik imalimmik. Partiit inuillu qinigassanngortittut pappiarami taasivissami tulleriiaarnertik malillugu allagartami allassimassapput. Qinigassanngortittut arlallit kattusseqatigiillutik qinigassanngortissimappata allagartaq tamatumunnga paasissutissanik imaqqartinneqassaaq. Allagartap taassuma assinga ineeqqami taasivissami, allannissami allequttap qulaatungingguani nivingatinneqassaaq. Allagartaq taaneqartoq Qinersinermut ataatsimiititaliamit

pissarsiarineqassaaq.

*Imm. 3.* Qinersisinnaatitaaneq inimut qinersivimmut, qinersisartup inuit nalunaarsorsimaffianni najugaanut qaninnerpaatut inissisimasumut, nammineeeluni ornigunnikkut atorneqassaaq.

*Imm. 4.* Inimi qinersivimmi qinersisartuq taasisitsinermik aqutsisumut taassumaluunniit tamatumunnga piginnaatitaanut saaffiginnissaaq. Taasisitsinermik aqutsisup taassumaluunniit tamatumunnga pisinnaatitaata qinersisartup atini inuuinilu pillugit paasissutissiinissaa piumasarissavaat. Qinersisartuq taamatuttaaq aperineqaruni najukkani pillugu paasissutissiinissaaq. Qinersisartup kinaassusia nalornissutigineqarpat pineqartup kinaassutsiminut uppersarsaammik saqqummiussinikkut tamanna uppersarsassavaa. Nunami namminerimi ID-kortimik Naalakkersuisut atuutsitsilersimappata, qinersisartup taasisitsinermik aqutsisumut taassumaluunniit tamatumunnga piginnaatitaanut saaffiginninnerani, qinersisartup nunami namminerimi ID-korti imaluunniit kinaassutsimut uppersarsaat alla takutissagaa, taasisitsinermik aqutsisup taassumaluunniit tamatumunnga piginnaatitaata piumasarissagaa, pillugu aalajangersakkanik erseqqinnerusunik Naalakkersuisut aalajangersaassapput.

*Imm. 5.* Qinersisartup kinaassusaa uppersarsineqareerpat, taasisitsinermik aqutsisup taassumaluunniit tamatumunnga piginnaatitaata qinersisartuq qinersisartut allattorsimaffianni nalunaaqutsissavaa, aammalu taasivissaq atorneqanngitsoq qinersisartumut tunniunneqassalluni.

*Imm. 6.* Qinersisartut kommunimi inuit nalunaarsorsimaffianni najugaqartut kommunimi taasiartorfissami nammineq toqqakkamini taasisinnaasut pillugit maleruagassanik nalunaarummi Naalakkersuisut aalajangersaasinnaapput.

*Imm. 7.* Taasineq pissaaq ineeqqami taasivimmi tamatumunnga aaqqissuunneqarsimasumi. Meeqqat mikinerusut ineeqqamut taasivimmut nassarneqarsinnaanissaat taasisitsinermik aqutsisup akuerisinnaavaa.

*Imm. 8.* Qinersisartup pappiara taasivissaq immersussavaa partiip nalaatigut imaluunniit qinigaassanngortittup Inatsisartunut qinigaatinniakkap aqqata nalaatigut krydsiliinikkut.

*Imm. 9.* Taasereeruni qinersisartup pappiara taasivik peqissavaa, kina taasimanerini allanit takuneqarsinnaajunnaarlugu. Qinersisartuq taamaalioreeruni pappiara taasivik peqitaq karsimut taasivinnut nakkartitsivimmut ikissavaa pissutissaqanngitsumillu uninnganani inimit qinersivimmit qimagutissalluni.

*Imm. 10.* Qinersisartup pappiara taasivissaq pissusissaatut nammineeeluni immersorsinnaanngippagu taasisitsinermik aqutsisup taassumaluunniit tamatumunnga piginnaatitaanut qinersisartuq pineqartuq pisariaqartumik ikiussavaa. Qinersisartut angallarunnertik allamilluunniit assigisaanik pissuteqarlutik inimut taasivimmut isersinnaanngitsut taasisitsinermik aqutsisoq isigitillugu inip taasiviup silatinnguani taasinnaassapput. Qinersisartup tappiitsuuguni isigiarsuttuuguniluunniit taasinermini inummit najuuttumit, nammineq toqqakkaminit, taamaallaat ikiorneqarnissani piumasarisinnaavaa.

*Imm. 11.* Qinersisartup pappiara taasivissaq kukkusumik immersorneqarsimappat imaluunniit mianersuaalliornikkut atorsinnaajunnaarsimappat allamik taarsertissinnaavaa. Taarsiisoqarsinnaanngilaq pappiara taasivik karsimut taasivinnut nakkaatitsivimmut nakkartinneqareersimappat. Pappiara taasivissaq utertinneqartuq taasisitsinermik aqutsisumit immikkoortillugu toqqortarineqassaaq.

*Imm. 12.* Taasisitsinermik aqutsisoq nammineq taasissaaq taasinerup nalinginnaasumik naammassinerata kinguninnguani.

*Taasivissat tunniunneqanngitsut aamma taasivissat taarserneqartut*

**§ 45.** Taasineq naammassineqarpat taasisitsinermik aqutsisup taassumaluunniit tamatumunnga piginnaatitaata immikkut poortugakkuutaarlugit makku kisissavai qilersussallugillu:

- 1) pappiarat taasivissat tunniunneqarsimanngitsut, aamma
- 2) pappiarat taasivissat allamik taarsigassatut utertinneqartut.

*Imm. 2.* Poortukkat taakku atortussat § 46, imm. 3-mi, kiisalu § 58-imi taaneqartut peqatigalugit qinersinermik siulersuisunut nassiunneqassapput.

*Sioqqutsisumik taasinerit*

**§ 46.** Taasinerup naammassineqariitsiarnerani taasisitsinermik aqutsisup taassumaluunniit tamatumunnga piginnaatitaata sioqqutsisumik taasinerit tiguneqartut ammassavai, aammalu sioqqutsisumik taasinerit ilanngunneqarsinnaanersut misissussallugu. Sioqqutsisumik taasinerit ilanngunneqarsinnaappat qinersisartup pineqartup aqqa qinersisinnaasut allattorsimaffianni krydsilerneqassaaq, allakkallu puussaat pappiaramik taasivimmik imalik ammarnagu karsimut taasivinnut nakkartitsivimmut nakkartinneqarluni.

*Imm. 2.* Sioqqutsisumik taasinerit ilanngunneqarsinnaanngilaq:

- 1) nassiussisoq qinersisinnaasut allattorsimaffianni ilaanngippat,
- 2) nassiussisoq ulloq qinersivik sioqqullugu toqusimappat,
- 3) puussaq allanik imaluunniit allakkanik nassitsissutinik, uppersaammik allakkalluunniit puuannik ataasiinnaanngitsumik imaqarpat,
- 4) puussap, uppersaatip, allakkat nassitsissutit allakkalluunniit puuata isikkuatigut isumaqarnarpat inatsimmut naapertuuttumik suliarineqarsimasuunngitsut,
- 5) Sioqqutsisumik taasinerup ingerlanneqarnissaanut suleriaasissaq malinneqartussaq malinneqarsimanngippat,
- 6) piffissaliussat § 33-mi taaneqartut iluanni sioqqutsisumik taasisoqarsimanngippat,
- 7) puussat taasisitsinerup ammarneqarnerata kingorna tiguneqarpata,
- 8) qinersisartuq nutaanerumik sioqqutsisumik taasisimappat, imaluunniit
- 9) qinersisartuq ullormi qinersiviusumi taasisimappat.

*Imm. 3.* Puussat, uppersaatit, allakkat nassitsissutit, allakkat puui pappiarallu taasivissat qinersinermik siulersuisunut nassiunneqassapput atortussat § 45, imm. 1-imi aamma § 58-imi taaneqartut ilanngullugit.

*Kisitsineq*

**§ 47.** Taasinerup naammassineqariitsiarnerani taasisitsinermik aqutsisup taassumaluunniit tamatumunnga piginnaatitaata najuuttut isigitillugit karsit taasivinnut nakkartitsiviit ammassavai, tamatumalu kingorna taasiviusut tiguneqassallutik. Taasisitsinermik aqutsisoq taassumaluunniit tamatumunnga piginnaatitaa karsit taasiviit ammarnissaannut akisussaasuvoq.

*Imm. 2.* Siullermik taasiviit aaqqissuunneqassapput, taasiviit partiimut ataatsimut imaluunniit partiit



avataanni qinigassanngortittumut ataatsimut taasiviusut immikkut qaleriiaarlugit  
ataatsimoortinneqarlutik.

*Imm. 3.* Tamatuma kingorna taasinerit qassit, taasinermi partiinik aammalu partiit avataanni  
qinigassanngortittunik (inummik taasinerit) taasivimmi allassimasuni taasiviusimanersut  
kisinneqassapput.

*Imm. 4.* Tamatuma kingorna partiinut ataasiakkaanut tamaginnut immikkut, taasinerit qassit partiimut  
tutsinneqassanersut (partiimik taasinerit), aammalu taasinerit qassit qinigassanngortittunut  
ataasiakkaanut (inummik taasinerit) tutsinneqassanersut kisinneqassapput.

*Imm. 5.* Taasinernik kisitsineq tamanut ammavoq. Qinigassanngortittoq kisitsinermi  
peqataaqqusaanngilaq.

*Imm. 6.* Inuit qinersisinnaatitaasut taasinernik kisitsineq malinnaaffiginiaarlugu takkussimasut marlunnit  
ikinneruppata, taasisitsinermik aqutsisup qinersisinnaatitaasut akornanni uppersaasussat marluk  
aggersassavai.

#### *Partiinut taasinerit aamma inunnut taasinerit*

**§ 48.** Taasineq krydsiliivissap iluani qinersisartup partiimut krydsilersimasaanut taasineruvoq (partimik  
taasineq). Sioqqutsisumik taasineq qinersisartup sioqqutsisumik taasivissami partiip atia allassimappagu  
taasineruvoq (partimik taasineq).

*Imm. 2.* Taasineq partiit avataanni qinigassanngortittup nalaani qinersisartup taasivissami  
krydsilersimasaanut taasineruvoq (inummik taasineq). Sioqqutsisumik taasineq partiit avataanni  
qinigassanngortittup sioqqutsisumik taasivissami atia allassimasaanut taasineruvoq (inummik taasineq).

*Imm. 3.* Qinersisartup qinigassanngortittup aqqata nalaani imaluunniit qinigassanngortittup aamma  
partiip qinigassanngortittup tunuliaqutarisaata aqqata nalaani krydsiliippat, taasineq  
qinigassanngortittumik taasinerit isigineqassaaq (inummik taasineq). Taamaaqataannik qinersisartup  
qinigassanngortittup aqqa imaluunniit partiip qinigassanngortittup tunuliaqutarisaata aqqa  
sioqqutsisumik taasivissami allassimappagu, tamanna atuutissaaq (inummik taasineq).

*Imm. 4.* Qinersisartup partiip aqqata nalaani imaluunniit partiimik krydsiliivissap iluani krydsiliisimappat,  
qularnaatsumik partiip qinigassanngortitaasa arlaat qinersisartup taaniarneraa allassimanani, taasivissaq  
partiimut taasiviusimasutut isigineqassaaq (partimik taasineq). Taamaaqataannik qinersisartup  
sioqqutsisumik taasivissami partiip aqqa imaluunniit partii taanna tunuliaqutaralugu qinigassanngortittut  
arlallit aqqi allassimappagit, tamanna atuutissaaq (partimik taasineq).

#### *Atuunneri*

**§ 49.** Pappiara taasivik taasiartorfimmi immersorneqarsimasoq atorsinnaanngilaq:

- 1) allaffigineqarsimanngikkuni,
- 2) erseqqisumik takuneqarsinnaanngippat partiit arlaat sorleq, imaluunniit qinigassanngortittoq partiit  
avataanniittoq sorleq qinersisartup taaniarsimaneraa,
- 3) pappiarap taasiviup isikkua malillugu isumaqarnarpat pappiara taasivik inatsit naapertorlugu  
suliarineqarsimasuunngitsoq, imaluunniit
- 4) pappiaraq taasivik immikkooruserneqarsimappat.

*Imm. 2.* Sioqqutsisumik taasineq atorsinnaangilaq:

- 1) allaffigineqarsimanngikkuni,
- 2) erseqqissumik takuneqarsinnaangippat partiit arlaat sorleq imaluunniit qinigassanngortittoq partiit avataanniittoq sorleq qinersisartup taaniarsimaneraa,
- 3) allakkat puussaat allamik imaqarpat imaluunniit pappiaranik taasivinnik ataatsimit amerlanerusunik imaqarpat,
- 4) pappiarap taasiviup isikkua malillugu isumaqarnarpat pappiara taasivik inatsit naapertorlugu suliarineqarsimasuunngitsaq imaluunniit pissusissat naapertorlugit immersorneqarsimanngippat,
- 5) pappiarami taasivimmi taamaallaat qinigassanngortinngitsup aqqa imaluunniit partiip qinigassanngortitaqanngitsup aqqa taamaallaat, imaluunniit
- 6) pappiaraq taasivik immikkooruserneqarsimappat.

*Imm. 3.* Taasisitsinermik aqutsisup qinersinermi allattaavimmi nalunaassavaa pappiarat taasiviit qassit atorsinnaangitsutut nalunaarutigineqarnersut, taasivit atorsinnaangitsut ataasiakkaat atorsinnaanginnerinut pissutaasoq naatsumik tunngavilersuutitalerlugu.

*Imm. 4.* Pappiarat taasiviit, ilanngullugit sioqqutsisumik taasinerit, atorsinnaanerisa nalilerneqartarnerat pillugu aalajangersakkanik sukumiinerusumik Naalakkersuisut aalajangersaasinnaapput.

#### *Ulloq qinersiviusumi naatsorsuineq*

**§ 50.** Taasinernik kisitsineq naammasseriiginnartoq taasinernik nutaamik kisitsisoqaaqqissaaq. Aatsaat kisitsinerit tullerit marluk assigiimmik inerneqarpata taasisitsinermik aqutsisup taasinerup inernera inaarutaasumik naatsorsussavaa. Kisitsinerit marluk tamarmik ulloq qinersivimmi pissapput.

**§ 51.** Qinersinermi allattaavimmi taasisitsinermik aqutsisup partiit qinigassanngortittullu nalunaarsussavai. Partiit ataasiakkaat taasinernik qasseraarsimanersut nalunaarneqassaaq, soorlu aamma partiit ataasiakkaat sinnerlugit aammalu partiit avataanni qinigassanngortittut ataasiakkaat immikkut qassinik taaneqarsimanersut nalunaarneqassalluni.

*Imm. 2.* Taasiartorfinni ataasiakkaani qinersinermi allattaavinni paasissutissat uku taamatuttaaq takuneqarsinnaassapput:

- 1) Taasiviit qinigassanngortittut aqqinik allaffigineqarsimasut tiguneqartut amerlassusii.
- 2) Taasinerit atorsinnaasut amerlassusii.
- 3) Taasiviit allaffigineqarsimanngitsut amerlassusii.
- 4) Taasinerit atorsinnaangitsut allat amerlassusii.
- 5) Sioqqutsisumik taasinerit tiguneqartut amerlassusii.
- 6) Sioqqutsisumik taasinerit isiginiarneqarsimanngitsut amerlassusii.
- 7) Pappiarat taasivissat taarserneqarsimasut qassiuneri.
- 8) Pappiarat taasivissat atorneqanngitsut qassiuneri.
- 9) Qinersisinnaatitaasut qassiunerit.

**§ 52.** Taasiartorfimmi qinersinerup inernera taasisitsinermik aqutsisup ingerlaannarluni qinersinermik siulersuisut siulittaasuannut nalunaarutigissavaa.

*Imm. 2.* Qinersinermik siulersuisut nalunaarutit imm. 1-imi taaneqartut kommunimi taasiartorfinnit

tigugunikkit ingerlaannartumik immersussavaat ajunnginnersullu misissorlugit. Tamatuma kingorna qinersinerup inernera ingerlaannaq Qinersinermut ataatsimiititaliamut nalunaarutigineqassaaq. Nalunaarut taasiartorfimmi pineqartumi qinersinerup ingerlanneqarneranut atatillugu pissutsinik immikkut ittunik qinersinerup inerneranut sunniuteqarsinnaasunik atuuttoqarsimanersoq paasissutissiisummik ilaqartinneqassaaq.

*Imm. 3.* Qinersinermut ataatsimiititaliap taasiartorfinniit qinersinermik siulersuisunut kiisalu qinersinermik siulersuisunit Qinersinermut ataatsimiititaliamut nalunaaruteqarnermi erseqqinnerusumik periaasissaaq aalajangissavaat.

**§ 53.** Qinersinermut ataatsimiititaliap inernerit qinersinermik siulersuisunit tigugunigit aammalu misissoreerlugit Qinersinermut ataatsimiititaliap qinersinerup inernera tamarmiisoq ingerlaannaq naatsorsussavaa (qinersinerup ulluani naatsorsuinertut). Qinersinermik siulersuisunit inernerit tamakkiisut sulii pigineqanngikkaluartut Qinersinermut ataatsimiititaliaq taamatut naatsorsuisinnaavoq, atortussat tiguneqarsimasut malillugit paasissutissat amigaataasut qinersinerup inerneranut sunniuteqarsinnaassanngippata.

*Imm. 2.* Naatsorsuinermi taasinerit tamarmiusut inernerisa naatsorsornerini taasinerit makkununga agguataarlugit ataatsimut naatsorsorneqassapput:

- 1) partiit ataasiakkaat taakkulu qinigassanngortitaat,
- 2) kattusseqatigiit ataasiakkaat qinigassanngortitaat, kiisalu
- 3) partiit avataasigut qinigassanngortittut ataasiakkaat.

*Imm. 3.* Tamatuma kingorna ilaasortaaffiit agguataarneqassapput d'Hondtip periaasia malillugu, tassa partiit ataasiakkaat, kattusseqatigiit ataasiakkaat partiillu avataasigut qinigassanngortittut ataasiakkaat taasisaasa katinneri 1-imik, 2-mik, 3-mik ilaasortaasinnaasut amerlassusaat tikillugu agguarterneqassapput. Siulliulluni ilaasortanngortitsissaaq partii, kattusseqatigiit imaluunniit partiit avataasigut qinigassanngortittoq amerlanerpaamik taagorneqarsimasooq, tulliulluni ilaasortanngortitsissalluni partii, kattusseqatigiit imaluunniit partiit avataasigut qinigassanngortittoq, amerlanerpaamut tulliulluni taaguunneqarsimasooq, taamalu pisoqaqattaassaaq inatsisartunut qinersivimmi pineqartumi ilaasortaaffissat tamakkernissaasa tungaannut.

*Imm. 4.* Ilaasortaaffiit partiimit kattusseqatigiiffimmilluunniit ilaasortaaffigineqalersussat partiip kattusseqatigiiffiulluunniit qinigassanngortitaanut agguarneqassapput siulliulluni ilaasortaasussanngorlugu qinigassanngortitaq amerlanerpaamik taagorneqarsimasooq, tulliulluni ilaasortaasussanngorlugu qinigassanngortitaq amerlanerpaamut tulliulluni taaguunneqarsimasooq, taamalu pisoqaqattaassaaq partiip kattusseqatigiilluunniit pineqartup ilaasortaaffissaasa tamakkerlutik agguanneqareernissaasa tungaannut.

*Imm. 5.* Partii kattusseqatigiilluunniit ilaasortanngortitsinissanut anguneqartunut naammanngitsunik qinigassanngortitsisimappata ilaasortatut inissat partiimit imaluunniit kattusseqatigiinnit taaguunneqarnerpaanut tulliusunit pineqassapput.

*Imm. 6.* Partiit, kattusseqatigiit partiilluunniit avataasigut qinigassanngortittut arlallit imm. 2 naapertorlugu amerlaqatigiimmik taaguunneqarsimappata, Qinersinermut ataatsimiititaliap makitsineratigut aalajangerneqassaaq kia arlaata ilaasortaaffik pissarsiarissaneraa. Tamanna aamma atuuppoq imm. 4 naapertorlugu partiip imaluunniit kattusseqatigiit qinigassanngortitaat arlallit assigiimmik taagorneqarsimappata.

### *Sinniisussat allattorsimaffiat*

**§ 54.** Qinersinermut ataatsimiititaliap partiinut tamanut kattusseqatigiinnullu tamanut qinigassanngortittut qinigaanngitsulli sinniisussat allattorsimaffiannut sinniisussatut Inatsisartunut ilaasortanngorsinnaanerminnut tulleriinnerat malillugu ilanngunneqarnissaat qulakkiissavaa. Qinigassanngortittoq qinigaanani amerlanerpaanit taaguunneqarsimasoq siulliussaaq. Tamatuma kingorna tulliusaaq qinigassanngortittoq qinigaanngitsuni amerlanerpaat tulliiit taaguunneqarsimasoq, taamatullu ingerlalluni tulleriinnilersuineq ingerlanneqassaaq.

*Imm. 2.* Sinniisussanik nalunaarsuiffimmi qinigassanngortittut marluk amerlaqatigiinnik taaguunneqarsimappata tulleriinnerat Qinersinermut ataatsimiititaliap makitsineratigut aalajangerneqassaaq.

### *Naammagittaalliorsinnaaneq*

**§ 55.** Qinersinerup ulluani naatsorsuineq tunngavigalugu Qinersinermut ataatsimiititaliap qinersinermi allattaavimmi nalunaassavaa kikkut qinerneqartutut isigineqarnersut qinerneqartullu qinigaanerat pillugu allakkatigut nalunaarfigalugit.

*Imm. 2.* Peqatigitillugu Qinersinermut ataatsimiititaliap qinersinerup ulluani naatsorsuinerup inernerat pillugu Inatsisartut ilisimatissavai.

**§ 56.** Qinersisartup qinigassanngortittulluunniit kinaluunniit qinersinerup atuussinnaassusia naammagittaalliutigisinnaavaa. Naammagittaalliut allakkatigut qinersinermik siulersuisunut attuumassuteqartunut saqqummiunneqassaaq naatsumillu tunngavilersuutitaqassalluni, qinersinerullu ingerlanneqarneranit ullut arfineq-marluk qaangiutsinnagit tunniunneqassalluni. Qinersinermik siulersuisut naammagittaalliut ingerlaannaq Qinersinermut ataatsimiititaliamut ingerlateqqissavaat qinersinermik siulersuisut oqaaseqaataannik ilallugu.

*Imm. 2.* Qinersinermut ataatsimiititaliap qinersineq pillugu naammagittaalliutit tiguneqartut ingerlaannaq suliarissavai.

*Imm. 3.* Qinersinermut ataatsimiititaliap naammagittaalliutaajunnartut pillugit aalajangiinerata kinguinngua Qinersinermut ataatsimiititaliaq qinersineq pillugu naatsorsuusiorallassaaq.

*Imm. 4.* Qinersinerup inerneranik naatsorsuigallarneq tunngavigalugu Qinersinermut ataatsimiititaliap § 8, imm. 2 naapertorlugu qinersinermi allattaavigisimasaa Qinersinermut ataatsimiititaliap Inatsisartunut ilisimatitsissutitut nassiutissavaa. Qinersinermi allattaavimmi §§ 53 aamma 54 naapertorlugit kikkut qinigaanersut kikkullu sinniisussatut qinigaanersut nalunaarsimassapput, kiisalu qinersinermut atatillugu pisut sukumiisumik allaaserineqarsimassallutik.

### *Qinerseqqinneq*

**§ 57.** Qinersinermi annertuumik kukkusoqarsimappat Qinersinermut ataatsimiititaliaq pisinnaatitaavoq qinersineq atorsinnaanngitsutut nalunaarutigissallugu aalajangerlugulu tamakkiisumik ilaannakortumilluunniit qinerseqqittoqassanersoq. Qinerseqqinneq piaarnerpaamik ingerlanneqassaaq.

Qinersinermut ataatsimiititaliap aalajangiinera tunngavilersorneqassaaq.

*Imm. 2.* Qinersisinnaasut allattorsimaffii atorneqarsimasut pingaarutilinnik amigaateqarpata Qinersinermut ataatsimiititaliaq peqatigitillugu aalajangiisnaavoq qinersisinnaasut allattorsimaffiat qinerseqqinnginnermi iluarsineqassasoq. Qinersisinnaasut allattorsimaffiat § 26, imm. 1 naapertorlugu saqqummiunneqassaaq.

#### *Qinersinermik siulersuisunut nassiussineq*

**§ 58.** Kingusinnerpaamik qinersinerup aqaguani taasisitsinermik aqutsisup pappiarat taasiviit qilertakkuutaarlugit ukununga immikkoortillugit poortussavai:

- 1) pappiarat taasiviit atorsinnaasut, aamma
- 2) pappiarat taasiviit allaffigineqarsimannngitsut atorsinnaanngitsullu allat.

*Imm. 2.* Tamatuma kingorna poortukkat imm. 1-imi, § 45 imm.1-mi aamma § 46, imm. 3-mi taaneqartut qinersisinnaasut allattorsimaffii atorneqarsimasut aammalu qinersinermut allattaavik taasisitsinermik aqutsisumit immersorneqarlunilu atsiorneqarsimasoq ilanngullugit qinersinermik siulersuisunut piaarnerpaamik nassiunneqassapput.

#### *Qinersinerup inernerana inaarutaasoq*

**§ 59.** Qinersinermik siulersuisut kommunimi taasiartorfissanit tamanit § 45 imm. 1-mi, § 46, imm. 3 aamma § 58-imi naapertorlugit qinersisinnaasut allattorsimaffii, qinersinermut allattaaviit pappiarallu taasiviit aamma atortussat taaneqartut tigoreerunikkit, qinersinermik siulersuisut atortussat qinersinermik siulersuisut qinersinermut allattaavigisimasaata assilinera ilanngullugu Qinersinermut ataatsimiititaliamut nassiutissavaat.

*Imm. 2.* Qinersinermut ataatsimiititaliap qinersinermik siulersuisunit tamanit atortussat tigoreerpagit Qinersinermut ataatsimiititaliaq qinersinerup atuussinnaassusianik inaarutaasumik aalajangiissaaq.

*Imm. 3.* Qinersinermut ataatsimiititaliap qinersinermik siulersuisunut atortussat pigineqartut tiguneqarnissaat piumasarisinnaavaa, taasiartorfinnit ataasiakkaanit atortussat amigaataagaluarpataluunniit.

*Imm. 4.* Qinersinermut ataatsimiititaliap qinersinermik inaarutaasumik naatsorsuinerani Qinersinermut ataatsimiititaliap qinersinermik naatsorsuigallarnernut sanilliullugu qinersineq pillugu paasissutissanik sukumiinerusunik pingaarutilinnik peqarpat, paasissutissat sukumiinerusut pingaarutilit taakku ingerlaannaq ilisimatitsissutitut Inatsisartunut nassiunneqassapput.

*Imm. 5.* Imm. 1 naapertorlugu atortussanik nassiussinerup qanoq pisarnissaa pillugu Naalakkersuisut sukumiinerusunik aalajangersaasinnaapput.

### **Kapitali 11**

#### *Ataatsimut aalajangersakkat*

**§ 60.** Naqitertitanut, tamanut nalunaaruteqarnernut pappiaranullu taasivissanut aningaasartuutit kiisalu sumiiffinnut kommunit aggornerisa avataanniittunut tunngasumik immikkut aningaasartuutit Nunatta

karsianit akilerneqassapput. Qinersinerup ingerlanneqarneranut atatillugu aningaasartuutit allat kommunimit pineqartumit akilerneqassapput.

**§ 61.** Kialuunniit qinersisartup kina taasimaneraa pillugu paasisutissanik tunniusseqqusinnaanngilaa.

**§ 62.** Qinersinermik siulersuisunut ilaasortat imaluunniit allat Inatsisartut inatsisaanni matumani aalajangersakkat malillugit inini pappiarat taasiviit tigooqqarneqarfianniissinnaatitaasut:

- 1) taasisitsinerup nalaani qinersisartunik siunnersuissanngillat, ilitersuissanatik kajumissaarissanatilluunniit partiimik sorlermik qinigassanngortitamilluunniit kimik taaseqqullugit,
- 2) allanik ilisimatitsissanngillat qinersisartuq una unalu najuussimanersoq imaluunniit pappiaramik taasivimmik tuneqqusimanersoq tunniussisimanersorluunniit, imaluunniit
- 3) allanut nalunaarutiginnissanngillat taasivimmi qinersisartup qinigassanngortitamik partiimilluunniit sorlermik taasisimaneranik paasisimasaminnik.

*Imm. 2.* Qinersisartut aggerlutik taasinerata Inatsisartut inatsisaanni matumani peqqussutigineqartumit allaanerumik nakkutilliineq inerteqqutaavoq.

## **Kapitali 12**

### *Pinerluttulerinermut inatsisitigut pineqaatissiinerit*

**§ 63.** 38, imm. 4-ip, § 42, imm. 4-ip, § 47, imm. 1-ip, § 61-ip aamma § 62-ip unioqqutinneqarneri Kalaallit Nunaannut pinerluttulerinermut inatsimmi maleruagassat malillugit akiliisitsinikkut pineqaatissiinermik malitseqarsinnaavoq.

*Imm. 2.* Peqqussutini § 35, imm. 9 naapertorlugu aalajangersagaasunik unioqqutitsinermut, Kalaallit Nunaannut pinerluttulerinermut inatsimmi maleruagassat malillugit akiliisitsinikkut pineqaatissiinernik aalajangersaasoqarsinnaavoq.

*Imm. 3.* Inatsisartut inatsisaanni matumani imaluunniit peqqussutini Inatsisartut inatsisaat manna naapertorlugu aalajangersagaasuni akiliisitsinissaq aalajangersarneqarsimappat, Kalaallit Nunaannut pinerluttulerinermut inatsimmi kapitali 5-imi maleruagassat malillugit pisinnaatitaasoq pisussaataasorlu akileeqquneqarsinnaavoq.

*Imm. 4.* Imm. 1-3 malillugit suliassat Kalaallit Nunaanni Eqqartuussivimmut siullertut suliarinnittussamut suliakkiissutigineqassapput.

*Imm. 5.* Akiligassiinerit imm. 1-3 malillugit aalajangersarneqartut, Nunap Karsianut tutsinneqassapput.

## **Kapitali 13**

### *Atuutilerneranut, ikaarsaarnermut aamma atorunnaarsitsinermut aalajangersakkat*

**§ 64.** Inatsisartut inatsisaat 1. decembari 2020 atuutilissaaq, Inatsisartunut qinersinermi tulluuttumi atorneqassalluni, taamaattoq takuuk imm. 2.

*Imm. 2.* Inatsisartut inatsisaanni matumani §§ 28-33 atuutilernissaannut piffissaq Naalakkersuisut aalajangersarsinnaavaat. Aalajangersakkat piffissani assigiinngitsuni atuutilernissaat Naalakkersuisut

aalajangersarsinnaavaat.

*Imm. 3.* Peqatigisaanik Inatsisartut inatsisaat manna atuutilernerani Kalaallit Nunaanni Inatsisartunut qinersisarneq pillugu Inatsisartut inatsisaat nr. 9, 31. oktober 1996-imeersoq atorunnaarsinneqarpoq, taamaattoq piginnaatitaanernut maannamut Inatsisartut inatsisaat tunngavigalugu pissarsiarineqarsimasunut, Inatsisartunut qinersinissap siulliup tungaanut, Inatsisartut inatsisaanni §§ 5 aamma 6 sulii atuuttussaallutik.

*Namminersorlutik Oqartussat, ulloq 24. november 2020*

Kim Kielsen

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut